

Othman Saat- tidak perlu berhenti, kata Dr. Mahathir

Bahan asal dari Arkib
Negara Malaysia

KUALA LUMPUR, Ahad — Datuk Seri Dr. Mahathir Mohamad berkata, Tan Sri Othman Saat, tidak perlu meletakkan jawatan sebagai Menteri Besar Johor disebabkan kealahannya untuk mengekalkan jawatan anggota Majlis Tertinggi UMNO dalam pemilihan semalam.

Beliau berkata, jawatan Majlis Tertinggi adalah jawatan parti manakala jawatan Menteri Besar adalah jawatan pentadbir.

Datuk Seri Dr. Mahathir berkata demikian sebagai mengulas kedudukan Menteri Besar Johor memandangkan beliau menduduki tempat ke-22 dengan undi 494.

Bagaimanapun Tan Sri Othman Saat berkata, kalah atau menang adalah perkara biasa baginya.

"Saya telah lama dalam parti dan sudah tentu kekalahan atau kemenangan menjadi perkara biasa," ujarnya.

Ditanya sama ada beliau akan meletakkan jawatan sebagai Menteri Besar, memandangkan adanya tekanan dari setengah golongan di Johor, beliau berkata, "terpulang kepada Perdana Menteri dan Parti untuk memutuskan perkara itu."

"Saya akan berkhidmat jika parti memerlukan," katanya.

Selain dari beliau, tiga anggota lain yang tidak berjaya mengekalkan jawatan anggota Majlis Tertinggi ialah bekas Menteri Undang-undang dan Peguam Negara, Datuk Seri Hamzah Abu Samah; Bekas Menteri Kebudayaan Belia dan Sukan,

Tan Seri Datuk Abdul Samad Idris, dan Bekas Timbalan Menteri Perumahan dan Kerajaan Tempatan, Datuk Ramli Omar.

Sementara itu, Menteri Besar Trengganu, Datuk Amar Haji Wan Mokhtar menganggap jumlah undi yang tinggi diperolehinya dalam merebut jawatan Ahli Majlis Tertinggi UMNO membuktikan UMNO memberi perhatian dan kepercayaan 'golongan lama' dalam parti tersebut.

Tamparan

"Ini sudah tentu memberi tamparan yang hebat kepada PAS yang selalu mendakwa UMNO tidak memberi perhatian kepada golongan agama sepertinya," kata beliau dalam wawancara dengan Berita Harian ketika diminta mengulas kemenangan itu.

Datuk Amar Haji Wan Mokhtar menduduki tempat pertama dengan undi 948.

"Dengan itu juga tuduhan yang mengatakan UMNO tidak menerima golongan agama dalam pucuk pimpinan parti adalah salah," tambahnya.

Beliau juga adalah Pengerusi Biro Agama UMNO Malaysia.

Datuk Amar Haji Wan Mokhtar menegaskan, kemenangannya itu bererti ahli-ahli UMNO memberi sokongan penuh kepada UMNO Trengganu mempertahankan negeri itu dari ditawan oleh PAS.

Katanya, Trengganu memang menjadi sasaran kuat kepada PAS memandangkan negeri itu bertambah makmur disebabkan hasil petroleum.